

申冕盟先生年譜附傳
金姬傳附別記
阿計替傳

同昌公主外傳
袁天綱外傳



阿
計
替
傳

撰人不詳

中
華
書
局

阿計替傳

阜昌七年春。阿計替以其所書上皇少皇鄭后。朱后生死事。屬余曰。祕密之。蓋余與阿計替姻婭也。阿計替本河北棣州人。靖康中。因賊將攻城。守城王若恩投降。爲府中介吏。來日賊將鐵立熾憾入城。王若恩與相見。拜跪坐聽。上熾立熾憾曰。此人貌似吾兄。吾常重之。乃以卮酒賜吾曰。飲之。乃呼吾從行。至是月餘。河北征伐。命我常常隨之。一日熾憾詣幹離不帳。請見議事。亦將吾偕行。時我以番服裝束。幹離不一見。呼我曰。阿計替何尙在。我但唯唯。熾憾曰。非真阿計替。乃此人貌似耳。因問我。則云是家人也。且使人訓吾以番語。謂熾憾曰。但呼作阿計替。待吾照管他。一日幹離不與熾憾飲。次且曰。阿計替休去他帳中。自此只在幹離不帳中。手執刀劍或弓矢。幹離不惜吾之慎謹。嘗語以密事。靖康二年。我已在幹離不帳下。手執弓矢。隨幹離不圍京城之安上載樓門。親見幹離不帳下將鐵斯可紅敗郭京。以刀砍落京左臂。遂墮地。爲可紅所殺。時可紅縱兵薄城下。高舉卓旗。指揮人渡濠。以石投牆。時安上門之西有金國兵將藥斯赤者。領一軍。名曰赤伏軍。運卓旗于洞子上。偶爲城上軍人所得。遂殺之。奪其卓旗。手持呼于城上。曰。殺了番人也。他處望見卓旗。登城。遂爭相奔潰。金人見城上軍潰。乃上城。東京之陷。出于談笑之間。次日。幹離不入城。居端相寺。命阿計替領軍人打撈。凡得財物千許。女子十四人。內城尙閉未開。然金人已將子城駐軍矣。又明日。子城開。幹離不入子城。居阿育王寺法堂。唯是粘罕使人計會打撈。取索金寶婦。

女。一日幹離不在法堂上坐。有執女子三人至。曰。獻與大王。時幹離不屬北部。先曾爲蒼王。故呼爲大王也。阿計替在傍。視其女皆姿色。顏汗而不能言。問其實。曰。荆王宮三女也。長曰檀檀。次曰修奴。幼曰環珞。今日胡人到荆王府取金寶。將父母敲殺。留吾三人在此。遂流涕不語。幹離不呼其子尙敷阜。曰。與你三人奴婢。遂引三女去。是夕聞尙敷阜俱淫焉。自此日日有挾女子到者。幹離不曰。若是百姓女子。卽分與左右親屬。若是皇族中女子。卽賜與尙敷阜。幹離不年六十餘。性猶酷毒。莫敢逆其意。尙敷阜有弟陸篤誅。年尙幼。每見女子。必就幹離不求之。幹離不與。又于尙敷阜求之。不得。一日伺尙敷阜大醉。使人殺之。盡將美女子中絕色者。自東京出奔外氏粘罕之長子。幹離不自此之後。不令人擄掠女子。所服事者二人皆美色。亦逐之。後亦入城。反爲他軍所得。尙敷阜遺下猶有二十餘人。幹離不悉分付與左右親從。阿計替所得一婦人。詢其本末。云是東京珠子舖王員外女。年十九歲。嫁與質舖周家爲媳婦。番人入城。殺戮滿家。被番人持我來獻元帥。遂與尙敷阜。又說其人飲酒五斗餘。啖肉五六十盞。每醉必御婦人。自夜至曉。未嘗少輟。婦女不勝其苦。旣而爲弟所殺。婦人皆喜。有緣奴有一妹在尙敷阜閣中。後爲陸篤誅刼持去矣。其後三月間。車駕出城。幹離不呼阿計替曰。我昨日已與元帥說及了。叫你去隨南國官家前往燕京。次日幹離不引阿計替見粘罕。面如赤棗色。大耳。蝦鬚。目中有赤光。顧視感人。呼阿計替曰。你是南州鐵立熾憾之兄乎。曰。然。粘罕曰。今叫汝押送趙某父子并他二妻往燕京。在路小心。因遣人令赴千戶同去。至中途。見騎兵護二帝者。乃同迤邐至燕京。及移安肅軍雲州五國城。及西汴州。又自源昌州。

等處。往來萬餘里。後少帝復自源昌州。兩徙至燕京。又復三四年。遂再四語余曰。我隨二帝二后。跋涉萬餘里。若非我愛護。死亦早矣。吾本大宋人。感他南朝恩德。故在路所竝不拘執。惟是溫言撫恤。及戒約左右護衛而已。余到冀州。乃持前州府所過事跡。以語余曰。萬一此文達江南。使中原可復。腥羶可除。而欲求其實。當以此進。余念阿計替之納忠。故直書其事于前。又見其本末于後如此。不暇飾之以文詞。覽者幸毋笑其拙。其間倘有忠義之人。能流傳以至南方。亦可顯阿計替之忠矣。今因南朝議。以河爲界。有張氏者。欲歸南。余乃書其本末。以與之。令持以南渡。其遺藁殘文。已悉焚之。不存其跡矣。阿計替本姓朱氏。名得成。棣州人。今見爲滑州宣德使云。